



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma : Tir Yimiyim

tiryimiyim@aolima

tir yimiyim

TAPAK 8

## Karnataka nung Job Reservation Bill ya temzung alema lir: Shashi Tharoor

## Alvaro Morata-i AC Milan nung kum pezü asayatsü



VOL. XXI ISSUE NO. 277 (ADOK 277) DIMAPUR KÜPTOKNÜ (SATURDAY) CHITENI (JULY) 20, 2024 ₹ 5.00

## NEP kum 4 ajungba atema Shiksha Saptah agitsü

**Dimapur, July 19, 2024 (TYO):** National Education Policy 2020 tenzüker July 29, 2024 nü kum 4 ajungba nungtem nung School Education Department-i Shiksha Saptah sentong ayongzüka agir.

July 22 nungi 28, 2024 tashi School Education Department-i thematic activities balala agitsü renemogo.

Ministry of Education, Government of India ajanga anogoshia Community Involvement aser chiyungtsü lemsatepa Tithi Bhojan amongtsü tetuyuba agüja lir. Iba dak sendakba nung Nagaland nunga schools atema state den apert sentongtem renemogo.

July 28, 2024 Deobar asüba agi iba anogo agitsü aliba activity ajak July 27 nü agitsü akok. District aser EBRCs ajanga akokba tashi school tem yaritsü ta DoSE-i metetdaksü.

DoSE-isa school ajak dang nikongdang 2:00 ako tashi nung anogoshia report agütsütsü metetdaksü.

Shiksha Saptah nung Teaching Learning Material (TLM) Mela/exhibition, DIET-i

TLM Mela, Slogans & Poster Campaign, Reading club, Story Cards/Chart Making/Toys & Games/story telling amala agitsü metetdaksü.

Maneni school tem dang Universal Foundational Literacy & Numeracy (FLN) dak sendakba sentong balala agitsü shiogo.

Shiksha Saptah nunga Sports Day, Cultural Day, Skilling Day amala alitsü metetdaksü.

Directorate of School Education (DoSE)-i Shiksha Saptah dak sendakba maparen ajak ketdangtsü aser PM Poshan teloki Tithi Bhojan ayongzüka nung yariteptsü.

Maneni, SCERT-i nungdakba academic teyari agütsütsü aser DIETs den osang metetpelasü. NBSE-i private un-aided schools den osang agitepa parnok indang daily report submission reprangtsü.

Maneni, NECTAR Project-i IEC materials renemtsü aser Samagra Shiksha-i line departments den report yanglutsü aser MoE, GoI dangi anogoshia osang yoktsü.

## UN okadaki Israel aitsür; Netanyahu-i magizüker

**New Delhi, July 19, 2024 (Agencies):** Israel-i kum aika Palestine nungter litsü atsünga agiba ya ozüng alema lir anungji tekaraba nung toktsütsüla ta International Court of Justice (ICJ)-i metetdaksü.

UN General Assembly-i mepishiba sülen ICJ-i Hokolbarnü iba advisory opinion sangoktsü.

"Israel-i East Jerusalem dena Occupied Palestinian Territory nung policy aser inyakyim atema ozüng tsütsü nungi jangjanür" ta UN General Assembly-i ICJ dang asüngdanga liasü.

"Israel-i Palestinian Territories nung tanen makai liyonga aruba ya ozüngi memelar. Israel-i tekaratiba nung toktsütsüla" ta ICJ presiding judge Nawaf Salam-i ashi.

Ajisüaka, Israel Prime Minister Benjamin Netanyahu-ibo iba ya magizük aser "tiyazü telemetbabatem" ta shiogo.

"Yihuda nungter ya pei lima atsünga agirtem masü. Onok yimtiba Jerusalem mesüra Judea aser Samaria (occupied West Bank) nung ozü oboula nungter senmang rakzüka agirtemji onok masü" ta Netanyahu-i ashi.

"The Hague nungter tiyazü telemetbabatem ajanga iba putiotsü ochi raksatsütsü. Ozü lima nung

Israeli nungter aliba atema ashishiteptsü makok" ta paisa metetdaksü.

UN General Assembly-i asüngdanga sülen ICJ-i taküm February ita hopta ka piyong sessions agidang linük balala nungi osangtem angadanga liasü.

Iba mapang tejembirtem ajaki Israel dang kum 57 atsünga agiba anentsü aser iba ajanga Middle Eastern aser alima asoshi lendong tulu bentsür arutsü ta shia liasü.

Israel-i tebang agi ashiba sessions nung maden saka tezüluba nungbo parnok okadaki asüngdangbatem ya külen tsütsü shir dang ta shia liasü.

UN nung tematiba okadaki ICJ nung alima tesem balala nungi obendanger 15 lir aser parnok iba 'non-binding advisory opinion' shiogo.

Hamas-i Israel anüdoklentip tsütsü amakba sülen Israel-i ita 10 tashi Gaza nung mitkar tashi amshia rarayonga arudang ICJ-i iba obendang agütsü.

Israel-i 1967 Mideast war nung West Bank, East Jerusalem aser Gaza Strip makzüka liasü. Israel-isa East Jerusalem par linük nung dendaktsü saka iba ya alima ajungai bo magizüker. 2005 nung Israel-i Gaza toktsü saka Hamas-i 2007 nungi Gaza madak yimsü asüba ajanga tenokdangba agüja lir.

## Joe Biden'er kinungertemi pa Tir election nung shilem magidaksünür



**New Delhi, July 19, 2024 (Agencies):** Joe Biden-i US presidential election nung shilem magitsü atema par kinungertemi jembiteper ta osang angazüker.

Joe Biden-ibo US Tir election nung tokteptsü ta shijen shia arur saka par kinungertemi pa indang exit strategy ka junga yanglutsü jembiteper ta NBC News ajanga ashi.

Par kinungertemi sentong atongba ya shitak atalokra Biden-i kum 50 tema public tenzüka wadang nung inyaka aruba tushiba dang masü saka Democratic Party-i taoba President Donald Trump madak takok angutsü atema jenjang yanglushitsü ta NBC report nung ashir.

Democratic Party sasep nung

lennirtem, party nem tenla agütsürtemi aser talisa Biden'er re-election team nunga züngsemtemi pa dang temlung melemtemba ajanga par kinungertemi iba onük sentong atonger.

Hopta asem tejaklen Biden-i Donald Trump den presidential debate nunga kanga mejungi shilem agia liasü.

Biden'er medemer ta bilemertemia pa dak temlung malemba atema par kinungertemi mepelaba metetdaksü.

"Parnoki Biden magiyonga yamaibo meinyaktsüla. Iba linük atema mapa aika inyaktsür public tenzüker ka yamai mesenmetua mamshitsüla" ta Biden den yariteper kati ashi.

Hokolbarnü Democratic

Party lenirtem- Montana Senator Jon Tester aser California House Representative Jim Costa nati Joe Biden dang Tir election nung shilem magitsü tayongzüka agütsü.

"Pai public aser linük tenzüka nung bendanga agüja inyakba atema ni tenüngsang agütsür. Ajisüaka President Biden-i kümsük tanaben atema re-election masütsüla" ta Jester-i ashi.

Tang tashi nung Congressional Democrats 25-i President Biden dang Tir election nungi tenüng meyipa agitsü yimjak nung metetdaksü.

Arishi kum 81 tain Joe Biden ya tang Delaware nung par kidang pa kija mongdar kechiyong pa dak coronavirus aliba puteta liasü.

Pa temang tajungba kümdar aser anti-viral drug Paxlovid agidar ta White House-i tanü metetdaksü.

Bodbarnü Nevada nung sentong ka nung adenba sülen pa dak Covid-19 aliba putet aser iba jagi Delaware nung amonger ta parnok ashi.

Taoba President Barack Obama aser Speaker Emerita Nancy Pelosi nati anir Democratic lennir aikati Joe Biden dang 2024 presidential election nung shilem magitsü shiogo.

## Bangladesh nungi India nungter kaketshir 300 tema aruogo

**Agartala, July 19, 2024 (Agencies):** Bangladesh nungter hopta ishika tensa mejungi aruba ajanga India nungter kaketshir aika linüki arutsüsa kumogo. Hokolbar tashi nung Northeast nung aliba border points ajanga kaketshir 300 tema aruogo.

Bangladesh nungter sorkar mapatem asoshi reservation tenzüka ajanga kaketshirtemi lungkak aitba sepaitem aser sorkar activists den raradang nisung 75 tashi taküm samaogo.

Hopta asem shi kaketshirtemi lungkak aita arur saka taoba Hombarnü Dhaka University nungter ozüng alema inyaksangshiba sülen tensa tamajungba aküm. Iba tasüngji nisung 6 tepset aser iba jagi sorkar linük nungter university ajak shibangtsü tetuyuba agütsü.

India nungter kaketshirtem teimbaka MBBS degrees azüngertem lir aser parnok ya Uttar Pradesh, Haryana, Meghalaya aser Jammu and Kashmir nungi teimba lir.

Hokolbarnü kaketshirtemi

Agartala anasa Akhurah nung International land port aser Dawki, Meghalaya nungter international land port ajanga aru.

Brihostibar nungi internet shibangba aser telephone services nungter timtem ajuruba sülen parnok linüki arutsü lemetet ta kaketshirtemi ashi.

Bangladesh nungter lungkak aitba ajanga India nungter 200 tema aruogo aser Bhutan o Nepal nungi kaketshir kar India-i arua lir ta Meghalaya nungter ketdangtsürtemi ashi.

Parnok rongnung Meghalaya nungi kaketshir 67 aser Bhutan nungi 7 dena lir. Meghalaya state sorkari Bangladesh High Commission aser Bangladesh Land Port Authority den India nungter anir arutsü atema osang agitepdar ta ketdangtsürisa ashi.

Hokolbarnü Bangladesh nungter kaketshirtemi Narsingdi district nungter jail ka nungi nisung noklang aika anizükogo.

"Jail nungter puoka alirtem jena ao aser lungkak aitertemi mi senoktsü. Nisung kwi ka jena

ao'ar ni meshitetsü saka noklang aika asütsü" ta police ketdangtsür kati ashi.

Dhaka nungter police force-i Hokolbarnü lokti sentong ajak noktanga liasü.

"Onoki tanü Dhaka nungter rallies, processions aser public sentong ajak noktangogo" ta police ketdangtsür Habibur Rahman-i ashi.

"Onoki lungkak aitba manentsü. Onoki Sheikh Hasina mapa nungi anentsü akhanger. Nisungter tepsetba ya sorkari teblemetsü khuret abentsü" ta kaketshir kati ashi.

July 1, 2024 nü High Court-i freedom fighters' quota tanaben tenzütsü temelaba agütsüba sülen kaketshirtemi lungkak aitsü tenzüker. Iba quota ajanga civil service posts nungter freedom fighters' nungi jazüker nem shilem asemsü nungi ka lemezüktsür.

Bangladesh kübok Dhaka, Chattogram, Rangpur aser Cumilla nungter kaketshirtemi süng aser lung amer police den raratepa arur.

# KMC tenüngsang agütsüba aser shisadokden senden amen



Kohima Municipal Council (KMC) indang Councillors aser staff tem nem tenüngsang agütsüba aser shisadokden senden ka Capital Convention Centre, Kohima nung July 19, 2024 nü agia liasü.

**Dimapur, Chiteni/July 19 (TYO):** Kohima Municipal Council (KMC) indang Councillors aser staff tem nem tenüngsang agütsüba aser shisadokden senden ka Capital Convention Centre, Kohima nung July 19, 2024 nü mena liasü.

Iba sentong nung menden ya Administrator, KMC, T. Lanusenla Longkumer liasü

asert KMC indang Accountant Ketholelie Seletsu-i ajanga sarasadema sentong tenzük.

Iba sülen KMC Administrator ajanga tarur pela agizükba o jembia aser Zakiekhotuo Kiso, Office Secretary ajanga Kohima Municipal Council puti otsü aser inyakym indang tongmelang agi lemsatepa liasü.

Iba sentong nung KMC Chairman Neikhozo Suokhrie aser Deputy Chairman Khrielevi Chüsi natia o jembia liasü.

Maneni Ward 5 nungi councillor Vimhalie Pienyü aser Ward 16 nungi councillor Aneiü Khaming natia council indang tarutsü mangdang aser nüburtemi shilem agitsüba tasa tem lemsatepa liasü.

# KVKs Hon Jubilee milen Mokokchung nung agizük

**Dimapur, Chiteni/July 19 (TYO):** Directorate of Agriculture ajanga ayongzuka Krishi Vigyan Kendra, Mokokchung nung July 19, 2024 nü KVKs indang Hon Jubilee benjongmung munga liasü.

Iba benjongmung temaitsü milen ya July 18, 2024 nü KVK Longleng ajanga KVK Mokokchung nem amokja liasü.

Iba sentong nung Khekali Sema, ACTO Horticulture menden liasü aser Dr. Keveletsu Khate, Senior Scientist and Head ajanga iba benjongmung teratet ashi.

Iba Hon Jubilee amungtsü mechi ICAR ajanga torch rally

ka tenzük aser New Delhi nung aliba ICAR-KVK Golden Jubilee conference 2024 nung tembangtsü, kong benjongmung tatembangba amungtsü, ta pai ashi.

Iba milen ya KVKs ajanga linük tesem ajungalen KVK districts 731 nung shisatsü prokshiba temaitsü lir, ta pai ashi.

Iba sülen aansotsü aser süngjanglijang aser vermicompost, mushroom aser apiary ama sen aruba mapa Kendra ajanga tensanga district nung amshitsü tetemsü aliba indang jembia liasü.

KVK Tuensang tenüng

nung iba milen agizüksang Samuel Sangtam, ACTO Agronomy, KVK, Tuensang ajanga sentong nung shilem agirtem dang Mokokchung tzü mopung den apet technology balala amshitsü ayongzuka liasü.

Aluyimer tenüng nung Limasanen-i Kendra ajanga yariba atema pelaba lemsatep aser tarutsü anogotem nunga aluyimer ajangzüksüsa maparen balala inyaktsütsü mepishia liasü.

Iba sentong nung nisung 30 arua shilem agia parnoki kiset shiruru metsütsü yimya balala indanga shisa lemsatepa liasü.

# Fazl Ali College nung capacity building workshop ka agir



**Dimapur, Chiteni/July 19 (TYO):** Banglanatak nungi züngsem pezüi akumba team kati Fazl Ali College, Mokokchung nung July 19-20, 2024 anogotem teshimtet kaketshir aser alumni tem atema "Documenting and Safeguarding the Intangible Cultural Heritage of Nagaland" indang capacity building workshop ka ayongzuka agitar.

Iba workshop ya parnok indang project nung mera ka lir, koba German Consulate Kolkata teyari nung lir aser iba ya ajanga Nagaland nung teshimtet district tem nung local Intangible Cultural Heritage

(ICH) forms jangjateta tashi itshtisü.

Naga nunger sobaliba, yimsüyimpong, skills aser yimya balala wazüka ayuba nung nüburtemi teyari agütsütsü asoshi ajungshiba workshop ka lir. Parnoki parnok nükjidong lemsatep, koba nüburtemi pei sobaliba otsü ashitsü atema sapang ka agütsütsü, branding tools ajanga artists/crafts indang cultural rights wazüka ayutsü aser sobaliba balala lungjemer maparen balala inyaktsü asoshi lir.

Iba workshop nungya UNESCO conventions, ICH amala nungjakoja balala indang

shisatsü agütsür. Kaketshir aser alumni tem dang document bendenba yimya balala nung amshiba osettsüset, document bendenba yimya, noksa aser video tangoka renemba indang yimyatem sayua liasü.

Iba workshop mezüng anogo nungya session tanabuba practical session (July 20) Ungma nung agitsü atema osang lemsatepa tembang. Teshimtet kaketshir telok ka nem iba workshop temer parnok den külemi inyaktsü maangka agütsütsü. Iba workshop nung streams balala nungi kaketshir 27-i shilem agitar.

# DPC züngsem züluokba/renewal lapoka lir

**Dimapur, Chiteni/July 19 (TYO):** Dimapur Press Club (DPC) atema züngsem tasen aser tejenpur tenüng züluokba mapang lapoka lir aser July 31, 2024 tashi alitsü, ta DPC sangdong ka ajanga ashi.

Züngsem tasen registration atema sen 300 aser tejenpur renewal atema sen 250 alitsü.

Registration tasen atema tenüng agütsür ya osang züluba/abenba maparen nung

küm an abo inyaker alitsüla. Temsüa aliba osangbener tem iba Club nung adentsü ajungshir, ta sangdong ajanga ashi.

Forms ya Dilip Sharma, Treasurer, DPC (9436003433), mesüra Asungba Ao (Imrong), Finance Secretary, DPC (9436003130) ket nungi angutsü aser tena nem July 31, 2024 tashinung agütsütsü akok, ta DPC sangdong ajangasa ashi.

# Dimapur DPDB senden ayonger

**Dimapur, Chiteni/July 19 (TYO):** Dimapur District Planning and Development Board pur July 2024 atema senden ya Deputy Commissioner, Dimapur indang Conference Hall nung July 22, 2024 anepdang 11:00 ako nungi amentsü, ta

Deputy Commissioner & Vice Chairman, DBDP, Dimapur, Dr. Tinojongshi Chang, NCS ajanga sangdong ka nung ashi.

Iba senden nung züngsem ajak medema arua adentsü metetdaksür, ta sangdong ajangasa ashi.

# DC Peren ajanga prangbong meyiba agütsütsü metedaktsü

**Dimapur, Chiteni/July 19 (TYO):** 18 buba Lok Sabha election aser ULB election 2024 takok ngua agia tembangba mechi Lok Sabha aser ULB

elections mapang yutsüba prangbong pei police station nungi meyipa meshitsü Deputy Commissioner, Peren ajanga metetdaksüog.

# DC Mon ajanga yimtsüng tasen recognition atema metetdaksü

**Dimapur, Chiteni/July 19 (TYO):** Mon District nung Phomching Sub-Division kübok Longwa Lailo village nungja agütsür yimtsüng tasen ka recognition atema Deputy Commissioner, Mon, Ajit Kumar Verma, IAS ajanga nüburtem dang sangdonga liasü.

Iba yimtsüng ya north tsütsü Takah River (Phomching) agi arütsü, south tsütsü Tangam River (Nyahnyu), east tsütsü Nyahchong (Longwa & Longwa Wasa) aser south tsütsü Taggi River (Tangnyu) agi arütsü, ta ashi.

Anungji kija/lokta/yimtsüng kari danga Longwa Lailo Village recognition asütsü memulungi mesüra temetongshitsü lira, DC Office, Mon nem iba osang sangdonger anogo 30 tsüngta tezüluba nung agütsütsüla, ta ashi.

Tai apuba indang tezüluba nung atakzuka aliba mapang magütsüra, iba yimtsüng recognition nung ashishiteptsü kecha mali ta angateta sorkar dangi nungdakba mera agitsü atema yoktsü, ta sangdong ajangasa ashi.

# Chingmelen nung Skill Proficiency training agütsü

**Dimapur, Chiteni/July 19 (TYO):** Building and Other Construction Workers, Advanced Training of Trainers (TOT) atema phase tanabuba Skill Proficiency Management training ka Tuensang district kübok Chingmelen indang Community Hall nung July 19, 2024 nü agia liasü.

Iba training ya Zynorique Initiative Society ajanga ayongzük, kong EAC, Tuensang, Mhathung Ngullie-i training agirtem dang rongsenketzüng tsütsü pei sasa

pei poksünga alitsü atema pei indang shisatsü aser sempet amshitsü ayongzuka liasü.

Nagaland ama state nung skill employment nungdaker aser sorkar nungi iba ama training aser teyari ajanga state nung mapa manguba tawa süngtsütsü, ta pai ashi.

Richard Belho, Chairman, Zynorique Initiative Society iba training nung adenertem metetpelaba mapang agi aser Leongba, Hd. GB, Chingmelen Village ajanga melepzüng o jembia liasü.

# Committee on Public Undertakings senden ayonger

**Dimapur, Chiteni/July 19 (TYO):** Advisor aser Committee on Public Undertakings, Nagaland Legislative Assembly indang Chairman, Imkong L. Imchen-i 2024-2025 atema iba Committee indang Introductory-cum- Adoption Meeting ka July 22, 2024 anungdang 11:30 ako

nung jazüka lir. Senden ya Nagaland Legislative Assembly Secretariat, Kohima nung Committee Room nung amentsü, anungji Committee indang züngsem ajak iba senden nung medema arua adentsü ayongzük, ta sangdong ka ajanga ashi.



July 19, 2024 nü Kochi nung Royal Saudi Naval Forces (RSNF) indang King Fahd Naval Academy nung training agirtemi Indian Navy indang First Training Squadron (1TS) nung Afloat Training Course agidang tangokba noksa nung angur.

### Taruba Parliament senden nung sorkari bill tasen 6 benoktsü

New Delhi, Chiteni/July 19 (Agencies): Taruba hopta tenzüksü aliba tzungluruwa mongpu Parliament senden nung Centre sorkari disaster management ozüing yanglushitsü bill ka densema bill tasen trok benoktsü, ta sorkar osang ka ajanga metetdaksü. Finance Bill densema sorkarisa Bhartiya Vayuyan Vidheyak, 2024 benoktsü, koba ajanga Aircraft Act of 1934 melentsü. Civil aviation sector nung business temelaba akümsü nükjidong nung iba bill benoktsü. Brihostibar aonung Lok Sabha secretariat-i iba osang ya

Parliament bulletin nung adokja liasü. Tzungluruwa mongpu senden July 22 nü tenzüksü aser August 12 nü tembangtsü. Union Finance Minister, Nirmala Sitharaman-i July 23 nü Union Budget benoktsü. Sorkari benoktsü aliba tanüngba bill temji The Boilers Bill lir, Coffee (Promotion and Development) Bill aser Rubber (Promotion and Development) Bill lir. Lok Sabha Speaker, Om Birla-isa Business Advisory Committee (BAC) tentetogo. Iba committee yagi Parliamentary nung tongtibang

onüktem dak sendakba teletetba agir. BAC nung chairman ji Speaker asütsü aser Committee nung züngsemtemji Sudip Bandyopadhyay (TMC nungi), P P Chaudhary (BJP), Lavu Sri Krishna Devarayalu (TDP), Nishikant Dubey (BJP), Gaurav Gogoi (Congress), Sanjay Jaiswal (BJP), Dileshwar Kamait (JD-U), Bhartruhari Mahtab (BJP), Dayanidhi Maran (DMK), Baijayant Panda (BJP), Arvind Sawant (Shiv Sena-UBT), Kodikunnil Suresh (Congress), Anurag Thakur (BJP) aser Lalji Verma (SP) nunger lir.

### BJP manifesto nung nangzuka aliba ajak ataloktsütsü: Rajasthan CM

Jaipur, July 19 (Agencies): Hokolbarnü Rajasthan Chief Minister, Bhajanlal Sharma-i, state sorkari BJP manifesto nung nangzuka aliba ajak ataloktsütsü aser budget nung aliba ama shidak inyaksü, ta metetdaksü. Jaipur nung aliba Chief Minister kidang Lalsot assembly constituency nungi aruba lokti den jembidang chief minister Sharma-i, Rajasthan state terenlok nükjidong ataloktsü

atema state sorkari revised budget renem, ta metetdaksü. Sharma-isa, state sorkar budget ajanga loktiliba nung nübur ajak nüngdak ataloktsütsü, ta ashi. State sorkari tarensen nung nokdaka alir ajak tajangzük angutsü atema schemes aser sentong balala benoka inyaker, ta paisa metetdaksü. Yaküm November 25 nü Rajasthan nung Legislative Assembly elections agia liasü

asur December 3 nü election osang sangdong. Iba election nung BJP-i Congress sorkar atsüngdok. Assembly menden 200 aliba state nung BJP-i menden 115 nung takok angu aser Congress-ibo menden 69 dang nguteta liasü. Rajasthan state nungbo tesüiba küm 30 jungnüa nüburtemi sorkar dang melung mesüra sorkar melentsü atema vote agütsür; ajioda sorkar melenpet melener.

### July 22 nü SC-i Electoral bonds dak sendakba ken o angadangtsü

New Delhi, July 19 (Agencies): Hokolbarnü Supreme Court-i, Electoral Bonds scheme dak sendakba nung corporates aser yimtenren party tem tsüingda tesendaktep aliba bushisüngdangtsü atema Special Investigation Team (SIT) nem agüjang, ta mepishiba ken o aika benoka lir aser item ken oji parnoki July 22 nü angadangtsü, ta metetdaksüogo. Chief Justice of India DY Chandrachud leniba nung Justices- JB Pardiwala aser Manoj Misra nungeri akümba bench-i, advocate Prashant Bhushan-i item temepishibaji tekaraba nung angadangtsü mepishiba ama Hombarnü parnoki item ken o angadangtsü, ta metetdaksü.

jungkai adoktsü, te temepishiba nungji shia lir. Iba ken o ya bushisüngdangtsü atema SIT nem agütsüsüla aser retired Supreme Court judge kati ketdangtsüa reprangtsüla, ta temepishiba agütsürtemi mepishia lir. "Bushisüngdangba ajanga dang lenla balala nung asalentong balala jungkai adoktsü; iba nungji company nung officers, sorkar ketdangsertem aser yimtenren party balala nung inyakerem dang masü saka ED/IT aser CBI nungi ketdangsertema adentsü; iba asalentong nung parnokia shilem agia lir amai reprangteter," ta temepishiba ken o agütsürtemi metetdaksü. Supreme Court-i Electoral Bonds scheme anentsüba sülen iba scheme dak sendakba osang ajak sangdongang, ta tuyua liasü. Substandard mozü balala yangluba Pharma company temia Electoral Bonds alizuka liasü, aser ibaji Prevention of Corruption Act, 1988 alema lir, ta ken o agütsürtemi metetdaksü. Taküm February ita nung Supreme Court-i Electoral Bonds Scheme anentsüba mapang nung SC-i SBI dang tangsa Electoral Bonds agütsüba anenang, ta tuyua liasü.

NGOs- Common Cause aser Centre for Public Interest Litigation (CPIIL) nati shell companies aser loss-making companies-i yimtenren party balala nem senotsü agütsüba ya bushisüngdangtsü atema ketdangsertem nem tetuyuba agüjang, ta mepishia Supreme Court nung temepishiba ken o benoka lir.

Electoral bonds scheme kübok sen crore aika dak sendakba ochimashi lir, ta tai tonglokja lir, aser ibaji Supreme Court-i ketdangtsüa jurila telok ka nem tashi agüja bushisüngdangba ajanga dang

### Karnataka nung Job Reservation Bill ya temzüng alema lir: Shashi Tharoor

New Delhi, July 19 (Agencies): Hokolbarnü Congress lenir aser Lok Sabha MP, Shashi Tharoor-i, Karnataka nung par party sorkari Karnataka Job Reservation bill benoka agizükba atema aitsüogo. Iba bill ajanga private sector nung Kannadiga (Karnataka nungertem) nem reservation agütsütsü. Shashi Tharoor-i, iba job reservation ya linük temzüng alema aser shisa maka, ta aitsü. Job reservation bill aija Tharoor-i, linük temzüng kübok linük tesem ajaklen sensotem alitsü, mapa inyaksü aser sademsadema senzütsü atema temeden agüja lir, ta ashi.

benokra Karnataka nung aliba business aika Tamil Nadu aser Kerala ama kidanger state temi belener aotsü, ta ashi. Haryana nunga tamalen sorkar kati iba ama ozüing benoktsü meranga liasü saka Supreme Court-i magizük, ta paisa metetdaksü. Hombarnü Karnataka state Cabinet-i "Karnataka State Employment of Local Candidates in Industries, Factories, and Other Establishments Bill, 2024" agizuka liasü, aser iba ozüing kübok nija company tem nung mapa balala Kannadiga nungertem atema mekazüktsütsü. Iba ozüing kübok industry, factory mesüra nija establishments-i management categories nung candidate shilem 50 bo lisopurtem (Karnataka nunger) shimsüla aser non-management categories nung candidates shilem 70 lisopurtem shimsüla. Iba ozüing aija industry lenirtem aikati, iba ama ozüing ya benokra Bengaluru nung alir mapa nung mongintem aika samatsü, ta aija liasü. Tech company NASSCOM-ia parnoki Karnataka nungi company belentsü ta ashiba den külemi industry balalai aitsüba sülen state sorkari iba bill mapa küma mebenoki alitsü lemtetogo.



New Delhi, July 19, 2024: Bangladesh nung longkak aiter kaketshirtem madak sepaitemi tashiyim amshiba anema Hokolbarnü New Delhi nung kaketshirtemi longkak aitba noksa nung angur.



# TIR YIMYIM

YIMOBILEM (EDITORIAL)

DIMAPUR

KÜPTOKNÜ

CHITENI 20, 2024

## Tai reprangteter maliba takoksa

**A**senoki aiben tangar dak tajung-tajung dang reprangtetsü aser asen mulungjang nunga tajung-tajung ta bilemtsü indang ajungshiteper aser aji shitak, kechiyong iba jagi asenoka pelaa alitsü aser tangartema peladaktsütsü. Ajisüaka, ano asen loktiliba, yimten, arogo aser kija taküm nunga tai reprangteter aser tai apur melira, tajung –tajung kisung jembia asenok lokti aser yimten dang masü saka arogoa dena tamajungba aser temenenba kuma aotsü. Kasaji, kodang asen taküm aser kibong nung tai apur aser tai reprangtetsür melilir, tsüraburi jembia aru ama, sanga-sanga sangpettsü aser memetetika asen taküm aser kibonga teraksenleni talangka oadoker alitsü. Aji oda, shishilemdaka chiyongtsü aser oset nung tai apur melira tajungba mekümtetsü. Iba amaji, tanü Nagaland Legislative Assembly nung amener tatar rongnunga kata opposition nung amener mali, tatar ajak okshia government nung adenba ya nübortem asoshi kanga takoksa aser timtem anguba mapang ka lir. Aji oda, state government kübok department noklang jungnüa aliba nung inyakertemi inyakba nung tai apur kata mali aküm nungji, nübortembo timatemer saka department-temi inyakbatembo ajak shitak akümer. Mapa ajak shitak saka timtembo tuluba akümer ta asüba lima nung alir nübortemji temangmangtsüka, parnokji tayokba aser talizükba lartem amai dang lir. Iba tensa tia ya kodang bilemdangdir, ibai mozü kidang tashidak puteta anepalutsür doctor kata mali, doctor ajak Directorate nung tulur kuma omaba amai lir. Aji oda, tangar ajak government nung aliyonga MLA ka danga mesüra ana danga opposition nung government inyakyim ajak mita reprangtsüsa alinungbo, tanü amai tzünglurua mapang Nagaland ajangba National Highway nung lishi aiteta yur nübortem pei ki metongtet timtembo majurula. Aji oda, tatartem rongnung pei akoksa-ang arema opposition nung amener ka-ana danga alinungbo government mozü kidang generator maliba agi mesüra tashidak tendangtsü machine maliba agi sensakertem sendem tulu nung sen apua bener tanga mozü ki bushia timtema mesenzüla. Kasaji, asen lima nung nübortem mechi timtem takoksa arema opposition nung MLA ka danga lilasang, sensakertem pei akaba ali kimong ajak yoktema yoka tangalen shiranger bener jajasa jajar tesüsa taneptsü mengutet tasümang bener marula. Iba kasaji asen lima nung opposition nung MLA ka danga lilasang, kaketshirtem rongnung Science züngnertem züngtetsüsa aser Arts, Commerce züngnertema sen meindoki züngtetsüsa government higher secondary school aser government college-tem tajung aika lila. Aji oda, asen lima nung government-i inyakba nung tai reprangteter ka ana danga alinungbo aluyimertema alu tajungba yimtetla aser Nagaland nung government ita sen dang nungibo teimba ngua alitsüsa lanurtem asoshi peisasa inyaka sen aatsüba mapatem inyaker meinyakma adoker lila. Kasaji, yimten nung dang masü lokti nunga tai reprangteta metongshitsür alinungbo asen lokti tentettem ya tang dang nungi tajungba aser tashi taitba kümer government nung alirtemia nüken tsüba lila. Aji oda, arogo nunga tenzükertem dak tai reprangteta arütsür alinungbo, tang dang nungi tanela khuret tabenba, ochi tashiba aser tenzükertem ajak tetsung tekara aser nütsüngtema telongjemba kümer lila. Tanü asen alidak asenoki aginüba ama temelenshi tajung ka marubaji, asenoki asen tai mangur aser tangar taia reprangteta memetongshitsür ta asüba ajanga lir. Iba jagi asenok nisungtembo ajak shitak saka asenok shitak purtemi inyakba mapabo kata meshitak ta akümer. Ibaji tesüngmangtsüka ! Joko, asen yimten, lokti aser arogo nung meshitakbatem ya shitak akümtsü atema asenok asoshi asenok dak tai reprangteter aika nungdaker, kechiyong asenok dak tai aika alitsüla amato asenoki inyakba mapatem agi sayur. Aji oda, asen lima yanglushitsü atemabo asenok ajak Ruling nung masü saka takoktsüka asübo, asenok ajak ya Opposition nung amen-ang tajungba süla.

## OLEMSABANG

**DIMAPUR GOVT. COLLEGE AO KAKETSHIR TELONGJEM SOBALIBASENTONG**

**APRIL 13TH, 2024 NUNG JEMBIBA**

**O JEMBIR: L. SOSANG JAMIR, D.C. (JUDICIAL) RTD.**

*(Yashi adok nungi...)*

Tateshitsü – Sungsatoba aser tenu Rongmangkokla otzü:

Tar nunger otzü “Mesentsükong” yim (an abandoned village) koba yim Sema Settsü anasa liasü. Idakji alir kibong ka nungi Süngsatoba aser pa tenü Rongmangkokla ta liasü. Aonung Asangur ka ayaterm nung Rongmangkokla yipteni aruasa la den ayip. Saka aji shibar memetet nung lai tetsü dang iba tatalokbaji ashi. Tetsüi la dang yamai ashi, nai nü teka pongnak (soot) nung mezüang aser aji nai Asanguba dak tejak nung nüjang ta ashi (blacken her hands with soot and rub them on his face) aser lai yamaji inyak. Tasüngnep tedi to tejak nung pongnak agi nüpanger kidangi shilang. Tedi-I tatok meshi.

Tetsü-i Süngsatoba Arürshi-I medemer den meshilangtsüsa odaktsü (go on a raid and die fighting) kodang par medemer yimdaki shilang Süngsatobai medemer ajanga tenu Rongmangkokla dangi Naro telang ka (bunch of Cockscomb) koba dang Chungleri “ALU NARO” aser Mongseneri “ALU ENCHANG NARO” ta ajar aji yok. Medemeri la dang yamai ashi, nüdi to süogo, pai nunem naro telang ya yok ta agütsü nung, Rongmangkokla aeindoka naroji (Cockscomb) meyoksar khumpa menunga aliba nungji enoktsü nung tanü tashi kong khumpa lu yimdir yangji khumpa den Alu enchang naru a meyr ta otzü lir.

3. Tetsü-Tebo adianu ayianu chirnürtem lembuba: Aor Sobaliba nung tebo mesüra tetsü tsütsü nungi jakzüba chirnür tem parnok anaben/tanaben jakzük tashi lembutsü (alitsü) makok. Kechiyong parnok ano azü ka dang lir.

**Mangmesoba otzü:**

Tsürabori ashi manga Mangmesobai tebo adianü chir (paternal cousin Sister) ka den ali. Saka par kipong timtim agi mekupanga liasü. Ano pai Alu nung “Shi” ka azüng, Saka iba shizü meyi dang tezü jagi tachicheleni (right side) matu tapenlenlen (left side) dang züa atu. Kechiyong Sobaliba nung tetsü mesüra tebo nungi anaben tashi jakzüba nungbo lemputsü makok, parnok Azü (blood) ka dang lir. Iba aeibenbaji pai bilemteta aru nung pai kinungtsü den bala. Aji sür kelen pai tetsür tasen ka den lia parnok jangratema ali ta otzü lir. Mangmesobai azüngba sungjang tezüji tabelenlen (left) leni Süng dak züa atu aji tanü tashi lir. Anungji Mangmesobai iba süngjang tangji Mangmeso/mangmangso ta aja, koba tetezü mashileni züa atuba tezü ta aja. Asenok meimchira shiba tanger aolen moer, mesüra mejajar iba dang Mangmangso tezü ama ta ajar.

4. Tatemsa: Tanü alima ya kanga kara aeinba Putu, tajung-tamajung külemi aeiner. Angazükba agi alima kar nungbo tebor or tebor na, tetsür o tetsür na kipong ka kuma liteper ta osang angashi dang kanga aoksar aser süngmanga bilemer. Kechiyong ajibo asen Sobaliba dak mapet.

Lai Levi 18:22

“Tebur Shingaia tebur den memedemtsüla; ibaji Tsüngremi “sempar”.

Lai Tazüngkunem (Deuteronomy) 22:5

“Tetsür kati tebur süoshi mesobutsüla, mesüra tebur kati tetsür süoshi mesobutsüla. Kechiaser shibaisa yamalaji inyakdir KIBUBA ne Tsüngrem madang tesempatsü lir”.

Anungji Aotsür Aor temibo item nungi jenboa, kumzüka alitsü merangtsüla.

Aor Sobaliba tezüluba maka nungji ni angazükba ajakbo shitak masütsü a akok. Anungji metokmebere lira tazunger tem metongshia agitsü mepishir.

Tulusang Tsüngremi Ao kaketshir tem Pa temoastü nung manene aniangma.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Archaeologist temi Kibuba benjung agiba takdang bushir



Khristantemi Cenacle semdangba mapang tangokba noksa ka angur.

**Jerusalem, July 19 (Agencies):** Yisu Khristai Pa nütüngtem den tatembangbuba chiyungba Kibuba Benjung agiba ya Laishiba otsü nung kanga tongtumbang otsü ka lir.

Yisu Khristai Pa nütüngtem den Kibuba benjung agiba sülen küm 2,000 dak tema süia arudang

Archaeologist temi Yirusalem nung Kibuba benjung agiba takdangji tejangja metettsü atema bushidar, ta osang ka ajanga metetdaksü.

Laishiba nung shia aliba Kibuba Benjung agiba tesemji Yirusalem nung ki tamentep (Upper Room) ka nung agi aser anaben amentepa asüba ki jaraji long sentsü temeren aser tanük agi yanglu; iba takdangji tang tashi Yirusalem yimti nung lir, ta archaeologist temi bilemer.

4th century AD mapang nung aliba noksa aika ngutetogo aser iba mapang nungjagi tenzüka küm shia Khristantemi Upper Room ji semdang.

Cenacle building nung Upper Room ji Yisu Khristai Pa nütüngtem den tatembangbuba chiyungba tesem lir, ta amanga küm shia Khristan meyirjang aikai Upper Room ji semdang.

33AD nung Kibuba Benjung agiba otsüji Laishiba nung tejangja shia lir, kong Yisu Khristai Pa nütüng 12 den külemi mener parnok dang

'nenok rongnung kati Ni ashioktsütsü' ta ashi.

Yisu Khristai amtsük aser yi moaja sarasadem aser Pa temangji raksatsü aser meimchir temenen shidoktsü atema Pa zü tokshitsü, ta ashi.

Upper Room dangji Cenacle taka ajar. Iba ya sarasadem takdang ka lir aser iba kidangji nisung 120 dak tema mentettsü.

Iba takdang indangji Luk 22:11-13 nung shia lir.

Cenacle ji Yirusalem yimti tejenba nung aliba Zion tenem nung lir.

1884 küm Greek Orthodox Khristantemi Jordan kübok Madaba nung Tenla ki tasen ka asüba mapang nung parnoki akhidang Yirusalem indang map tejen ka nguteta liasü. Iba map ji 560 AD nung Israel indang map liasü. Map nung teratet ajakji Greek oshi nung zülua lir.

Map nungji abelen tsütsülen Damascus Gate aser Plaza lir, tsünglanglen Jaffa Gate lir aser ajichilen Bethlehem lir.

2017 küm University of North Carolina nung Religious Studies lecturer, David Christian Clausen-i langka ka reprangteta liasü- Cenacle ama sentsü temerem ki ka liasü aser ibaji kasa tesem nungsa liasü. Ibaji ajanga research agirtemi Upper Room ji Kibuba Benjung agiba tesem liasü ta amang tenzüka, ajisüaka parnoki ano kuli tali nungdaker.

6th century nung yangluba noksa ka 1846 küm Italy nung nguteta liasü. Iba noksa nungji

Yisu Khrista katu ka nung mener Yirusalem yimti southern gates leni aoba lir aser kasa noksa nungjisa Cenacle lir.

Mathi kaket nung Yisu Khrista Yirusalem-i aiba indang shia lir.

Ano 4th Century mapang nung lung agi chitetba noksa ka 1585 AD nung nguteta liasü. Lung agi chitetba noksaji Yisu tasü nungi shia aruba sülen Pa Mary Magdalene matsüngdang nokdaka lir, aser tesülenji kasa ki (Cenacle) lir.

Yohan kaket nung shia aliba agi, Yisu Khrista tasü nungi shia aruba sülen Pa tanaben Upper Room jagi ao.

2019 küm Israel Antiquities Authority (IAA)-i laser technology aser advanced photographic imaging amshia mapang shia Cenacle yanglushiba noksatem indokba sülen Kibuba Benjung agiba mapang nung kiji koma liasüar ibaji jangjatsü meranga liasü.

Iba mapang nungji Antiquities Authority (IAA) nungi züngsem kati, noksa tasenba nungji tsüngbang nung Agnus Dei aser Lion of Judah noksatem lir; lion ji David Chuba temaitsü lir aser Yisu ya David kidong nungi jakzüka lir, ta ashi.

Paisa, research agirtemi maneni bushisüngdangtsü nungdak, kechiyong Cenacle ji Kibuba benjung agiba tesem ta ashitsüsa tang tashi nungbo archaeological kuli mangur, ta ashi.

## Putir Abraham Thazhathedathu-i maneni bail temepishiba agütsü

**July 19, 2024:** Madhya Pradesh nung school fee ozüng alema inyakba atema Khristan putir ka jail nung puoka lir; pai bail temepishiba agüja liasü saka magizükba sülen July 18 nü pai maneni bail temepishiba tasen ka agütsüogo.

Madhya Pradesh nung Jabalpur diocese nungi putir, Abraham Thazhathedathu-i bail temepishiba agütsü saka July 12 nü court-i magizükba sülen maneni July 18 nü pai Madhya Pradesh High Court

nem temepishiba tasen ka agütsüogo.

School fee atutsü atema ketdangsertem dang nungi temelaba memeshi, ta tai tonglokja May 27 nü putir densema nisung 22 pua liasü. Jabalpur diocese-i ketdangsuba school asem aser Jabalpur nung aliba Church of North India (CNI)-i ketdangsuba Khristan school pongu nem sorkari tai tongloktsüba sülen Khristan aika apu.

July 19 nü osangbener den

jembidang Jabalpur diocese nung putir, Davis George-i, "Putir Thazhathedathu den school nung staff kar chioktsü atema onoki tang agi tanabenbuba bail temepishiba high court nem agütsüogo," ta metetdaksü.

Paisa, "Tanabenbuba temepishiba agütsüba ken ojibo judge kati masü saka division bench kati angadangtsü, anungji tangbo onoki ochi temeden angutsü imlar," ta metetdaksü.

## ANO GO ABEN TSÜNGREM DEN

### Tsüngremi yaribayim

*"Kechiyong nenok asoshi kü sentong ni meteta lir, oda tamajung asoshi masü, tesülen nenok nem teimla agütsütsü yimjung indang tebilemba, ta Kibubai ashir" (Yerimia 29: 11)*

Tsüngrem par chir kaji takok ngudaktsüner, tepela kadaktsüner, temulung süa lidaktsüner, kümzüka aser yimjung nung lidaktsüner. Tasoba anogo nungi item ya nü mulung aser kolok nung ainer. Meteta aser memeteti iba sentong ataloka nü shisatsü nung mapa inyaker.

Saka ken ken nü sentong tajung aser alizüng Tsüngremi na asoshi renemtsüba den meputepi tsükteper. "Ni amangba shitak süra ni koda Tsüngremi mulungba metettsü ?" "Ni atura mapang matong tashi atatsü asü ?"

"Taküm nung mepetmesü kar ajanga ni amangbaji tai ta metettsü asü?". Yamaji masü. Aseni amangba Tsüngrem den shitak sentaktepa lira anogo shia ajangshia aruba nungi Pai mulungbaji metettsü. Asen tebilemba sentong meyipa reprangtsü aser nü alizüng jangjashidaktsütsü asoshi Tsüngremi lenmang renemja lir.

Iba teyariyimji ne tejangraba (emotion) lir. Kodang ajangshia aruba mesüra tesentaktep kati ka ain adokdaksür, shisa boludaktsür, mesüra teimla makai kümdaktsür, item jagi nai amangbaji tai ta kuli agütsür. Asen alizüng nokdangra, ain adoker. Alizüng mejangjara shisabulur. Asen alizüngji tamakoktsü ta bilemra teimla makai akümer.

Tsüngremi agütsüba alizüng nokdangtsü akoktsü asü ? Tsüngremi mapa kar inyaksü bilemra aji thinentesü akoktsü asü ? Kibuba, tanü kü tebilemba Ne den sentaktepa melira angatettsü yariang.

## Uttarakhand nung House Church ka amak

**July 19, 2024:** Taoba tetsür kar densema Khristan Amongnü Uttarakhand kibong züngsemtem dak azük yimtiba, Dehradun nung Hindu aser ki raksatsü. Tesüsa yimsü alia amanger nisung 35 dak temai house church ka amak, ta International

Khristantem aika yirua hospital-i anir ao aser parnok rongnung tetsür katibo Hindu nungertem jagi house church ayongzüka kibong züngsemtem kanga mejungi yirutsü aser ki bensaja liasü.

Hindu nungertem jagi house church ayongzüka kibong züngsemtem kanga mejungi yirutsü aser ki bensaja liasü.

Iba tatalokba ajanga Uttarakhand nung Khristantemi kanga jashia Arogo lenirtem dang state nung mapang shia Khristantem amakba anema ola adoktsü aser longkak aittsü asoshi sentong ayongzüka, ta mepishiogo.

House church kibur jagi Hindu nungertem Khristan yimsü dangi meyipdaksütsü atema sentong ayongzüka, ta parnok nem tai tongloktsü.

Hindu nungertem jagisa, tetsür ka aser lar chirnurtem kangshia Khristan yimsü dangi meyipdaksüba sülen ki ka nung anogo ananü tashi ayu, ta Khristantem nem tai tongloktsü.

Hindu nungertem jagi nükjidong nung inyaker.

AO OSHI ANGAZÜKDAK: TANÜ ANGAZÜKTSÜBA OJANG



Tajungtiba

(adv) ajak rongnung tajungba (best)
\* Takok angur tajungtiba nem loktii senpet agütsü.

Tajuok

(adv) mapa tamajung inyaksü ajungshiba (incite)
\* Lokti nung timtem agütsürtemji lenir kari tajuokba purtem liasü.

OLONG PAITEP # 6850

Grid for Olong Paitep # 6850 with numbers 1-16 in various cells.

TIPIEN

- 1. Tzü beshiba aou - (6)
2. Meshiyonga ao - (4)
4. Teimba aküm - (6)
7. Lai nung ainkar ka - (4)
9. Süngküm lanu - (4)
10. Tapok - (4)
11. Kisüng - (4)
14. Lai nung tanabuba kakat - (6)
15. Ani \_ \_ \_ \_ zük - (4)
16. Tepu meyidak - (6)

LANGTSÜLEN

- 1. Azüzükba shisatsü - (8)
2. Nemjema bilem - (4)
3. Tentet - (4)
5. Temechi - (4)
6. Kishi den tilaba apaba - (7)
8. Tekolok-i agütsüba - (8)
10. Yagi menemer - (4)
12. Zükolak tzü - (4)
13. Bangsemo lendok - (4)

OLONG PAITEP # 6849 TELANGZÜBA


TIPIEN :

- 1. Aben, 4. Artsü, 7. Lisem, 8. Liwa, 9. Sarasadem, 12. Aket, 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar, 6. Belem, 9. Sүjak, 10. Aonung, 11. Dokan, 13. Tinu.

NAI-A YA METETTER MA



- 1) Ut dakbo nuküptsü (eyelids) asem keta lir aser ibaji ajanga lisem, aoyi nungi tenük kümzüker.
2) United Nations-i shimteta aliba oshi (official languages) trokji : English, French, Arabic, Chinese, Russian, & Spanish lir.
3) Tsüngrem tenüng nungi agiteta nüngja magütsüba alimaji (planet) asenok aliba lima 'Earth' ya dang lir.

Manipur nung DMU kaketshirtemi lumia lungkak aitba anener



Imphal, July 19, 2024

(Agencies): Dhanamanjuri University (DMU), Imphal nung kaketshirtemi July 9 nungi lumia lungkak aita aruba Hokolbarnü khen atema anenogo.
DMU ketdangsürtem aser kaketshirtem tsüngda tenangzüktep ka agiba sülen iba lemtet agi.
Dhamanamanjuri University Students' Union (DUSU)-i regular Vice Chancellor, registrar aser staff shimang ta

takhangba agüja Imphal nung parnok campus nung lumia lungkak aittsü tenzüka liasü.
Hokolbarnü DMU president Irom Dimocha-i khen atema lumia lungkak aitba anentsü metetdaksü.
Registrar aser tanga nüngdakba staff dena administrative job results sangdongba sülen university syndicate-i yasüng rongdak senden ka nung bangzüng ka renem.
Ketdangsürtemi DMU dang

August 9, 2024 tashi nung regular Vice Chancellor ka shimtsü atema mapa inyakdar ta nangzük.
DMU kaketshirtem Manipur University nung provisional admissions temelaba agütsütsü ta ketdangsürtemisa nangzük.
DMU nung kaketshir 10,000 shi lir. Parnok ya constituent college pungu- DM College of Science, DM College of Arts, DM College of Commerce, GP Women's College aser LMS Law College nung azüngertem lir.

Assam nung Hmar telungpur 3 khasetba atema ashishiteper

Guwahati, July 19, 2024

(Agencies): July 17 nü Cachar district nung Assam Police den khatepdang Hmar nung asem tepsetba aitsür ta Indigenous People's Forum (IPF)-i metetdaksüogo.
Hmar lanur asem-Lallungawi Hmar, Lalbiakkung Hmar aser Joshua Lalringsang nung Bhuban Hills jungles nung police-i khaset.
Par asem ya July 16 nü apu ta Cachar Superintendent of Police(SP)-i ashi saka iba sülen telungpurtem police den khatepdang asü ta metetdaksü.
Police-i ashiba aser social media nung video tem meputeper ta IPF general secretary L. Hlima Keivom aser president L Kuki nati ashi.

Social media nung video ka nung lanurtem autorickshaw ka nung lia apuba sayur. Iba mapang parnok police-i ashiba ama combat gear masem liasü. Tanga video ka nung parnok alener anir aoba sayur ta IPF-i ashi.
O meputepba den ajungbena hospital morgue nung injang agi khasetba tasümgangtem anguba ajanga par asem ya police-i pua anir orr khasetba ama bilemer ta IPF-isa metetdaksü.
"July 16, 2024 nikonngang 4.30 ako meta lanur asem Krishnapur Road nung apu. Parnok dang asüngdangya asü dang parnok den yaritepertem Bhuban Hills nung jenoka aliba ashi. July 17, 2024 anepdang Bhuban Hills nung special operation ka agidang

bulletproof jackets aser helmets semer telungpur asem yirur lia apu. Iba sülen parnok Silchar Medical College Hospital (SMCH) nung asü" ta Cachar SP-i ashi.
"SMCH nung injang agi khaseter aliba tasümgangtemji July 17, 2024 anepdang Bhuban Hills nung yirurtemji süra, iba ya matalokdang apuba lanur asem kongi ao? Parnok kong lir" ta IPF-i asüngdang.
IPF-isa iba tatalokba jungjunga bushisüngdangtsü aser National Human Rights Commission (NHRC) danga bushisüngdang asütsü ayongzükogo.
Parnokisa tasür kibongtem nem senotsü teyari agütsütsü takhangba agütsür.

Meghalaya sorkari Bangladesh nungi kaketshir 67 anir aruogo

Shillong, July 19, 2024

(Agencies): Meghalaya sorkari Bangladesh nungi kaketshir 67 anir aruogo. Bangladesh sorkar mapatem nung quota system atema kaketshirtem aser security tsüngda raratepba agi tensa mejungi lir
Meghalaya Chief Minister

Conrad K Sangma-i akokba tashi yariteptsü ta metetdaksüogo.
State sorkari Bangladesh High Commission aser Indian High Commission den külemi India kaketshirtem kümzüksü atema inyaker.
Meghalaya sorkarisa Nodal Officer Hiwot Rymbai (+91 96157 16153) aser Assistant

Nodal Officer Thomas (+91 84150 60802) na shimogo. Ano helpline number 1800 345 3644 ka lapokogo.
Bangladesh nung raratepdang nisung 39 tashi süogo. Brihostibar nungi ano tensa tamajungba küma lir aser lungkak aitertemi kiojen aika raksatsüogo.

Digboi refinery indang capacity teimba akümtsü: Sonowal

Dibrugarh, July 19, 2024

(Agencies): Prime Minister Narendra Modi-i Digboi refinery capacity 0.69 million tonnes nungi 1 million tonnes kümdaksütsü ta Union minister Sarbananda Sonowal-i ashi.
Tesüiba sorkari Digboi Refinery senzüka yutsüba ajanga capacity expansion mesütet ta Sonowal-i ashi.
"Digboi Municipality aser

Makum Municipality ya kanga tongtipang lir. Sorkari item heritage zones asoshi temlung agütsür. Digboi Municipality yabo linük nunga ajaki meteta kümogogo aser Asia nung oil refinery tejentiba lir. Sorkari Digboi Refinery indang capacity teimba akümtsü" ta Union minister-i metetdaksü.
"Vajpayee aser Modi sorkartem mapang Dibrugarh

asoshi temlung agütsür aser rail, road, air, aser water connectivity kanga renlokogo. Prime Minister Narendra Modi'er "Sabka Saath, Sabka Vikas" ajanga Dibrugarh nung industrialization aser youth employment shia aruogo" ta Sonowal-isa metetdaksü.
Külen, Sonowal ya Digboi aser Makum municipality tem nung ex-officio member ka ama züngsemogo.



**TRANS-FAT**

Trans fats, mesüra trans-fatty acids ya “unhealthy” category nung aitba temu tabu ka lir, kechiaser iba yagi nü temang nung temulungjang tashidak adokdaksütsü aser temang nung teyari kecha mali.

Trans fats achiba ajemtsü atema tsünglanglen shia aliba sülen anidaksüla;



Sorochioktsü atema vanaspati mesüra margarine ajema amshiang.



Biscuits, cookies, chips, cakes, patty, puffs amala baked/processed sür aliba chiyongtsü achiba ajemang.



Vanaspati totzü amshia fried asüba Aloo chaat, French fries, samosa, bhatura amala achiba ajemang, aser kasa totzü aiben mamshitsü merangang.



Asangtsü/asotsü atema kasa totzü aiben mesüra tanaben tamshi.

Nutrition Facts	
About 113 servings per container	
Serving size 1 tbsp (12g)	
Amount per serving	
<b>Calories 110</b>	
	% Daily Value
Total Fat 12g	15%
Saturated Fat 3g	15%
Polyunsaturated Fat 6g	
Monounsaturated Fat 2.5g	
Sodium 0mg	0%

Label nung “partially hydrogenated vegetable oil”, hydrogenated vegetable oil” mesüra “shortening” amala ingredients reprangang, kechiaser item yagi trans-fats adokdaksür.

**Industrial trans-fats ya chiyongtsü indang moko.**

Trans-fat yagi bad cholesterol (LDL) tali kümdaksür aser good cholesterol (HDL) ajemdaksür.

Chiyongtsü indang taste mesüra jenjang mesamadaksüi trans-fat ya totzü tajungba agi melentsü akok.

**Nü mulungjangi dang tetsüngtaji metettsü**

State Food Safety Authority,

Department of Health and Family Welfare, Govt. of Nagaland.

**Bangladesh nung longkak aitdak asür nisung 30 alemogo**

**Dhaka, Chiteni/July 19 (Agencies):** Mepetmesü adoka aliba Bangladesh nung Brehostibarnü nisung 18 tepsetba ajanga Hokulbarnü tashinung asür nisung 30 alemogo aser nisung 2,500 dak tema yirua lir. Sorkar mapa nung quota system melenshitsü atema takhangba agüja kaketshir temi linük yimtiba Dhaka aser tesem balala nung kanga sashia longkak aita arur.

1971 küm Pakistan nungi nüjiso mechia rara kinungertem densema sorkar mapa nung menden wazüka yutsüba atema university kaketshir temi Dhaka aser danga yimtem nung hopta ka dak tema longkak aita arur. Longkak aiter temi Dhaka kübok Rampura area nung sorkar meyong Bangladesh Television Bhaban sapanga ki tejaklen raksatsü, yangji anena aliba gari kar nung mi senloksü aser osangbener densema yangji inyaktertem temai madokteti liasü.

“Tanü (Brehostibarnü) linük tesem ajungalen longkak aiter aser ozüng amshirtem aser ruling party nisungtem tsüngta

raratepdang nisung 18 asü aser 2,500 dak tema yiru,” ta The Daily Star osangkaket ajanga ashi. Aji masüadang Prothom Alo osangkaket nunga, “Nisung 11 asüba osang lir. Parnok ya nisung toku Dhaka nung asü, ka Savar nung aser ka south-west Madaripur district nung asü,” ta shia liasü.

Longkak aiterem arishitsü mechi police temi maneni rubber bullets, tear gas aser sound grenades tem amshir, ta Somoy Television channel ajanga ashi. Longkak aiter aser police tsüngta linük yimtiba nung Uttara area nung tesashiba raratepa liasü, kong private universities aika lir. Ketchedang sür temi asürtem ajak indang tejangja meshitet saka asürtem ya timba kaketshir lir ta osangtem ajanga ashir.

Mongulbarnüa kaketshirtem timba sür nisung trok asü aser iba aonung nisung ka asüba osang liasü, anungji hopta ka jakdang longkak ait tenzüker nisung 18 süogo.

Ajisüaka police temi tang tashi asüamaba indang sangdong kecha agüja mali.

Tensa tali tamajungba akumba ajanga ketdangsür temi Brehostibar nikongdang nungi tenzüka linük yimtiba telungzüc nung metro rail aser Dhaka nungi aoba aser aruba railway services tem shibangogo.

Longkak aiter azüoktsü mechi sorkari mobile internet shibangtsü totuyuba agütsü. Bangladesh police indang website ya mamshiteti liasü aser ruling Awami League indang student wing Bangladesh Chhatra League indang website ya hack asü. Ketchedang sür temi tensa azüoktsü mechi linük yimtiba densema tesem balala nung Border Guard Bangladesh personnel tem yoka lir.

Paramilitary Border Guard Bangladesh (BGB), riot police aser elite anti-crime Rapid Action Battalion (RAB) tem Dhaka aser danga yimti tulutem nung senzüdaksür aser sorkar indang offices aser banks tem lapokaka public transport peria maliba ajanga nisung kangabo meliasü. Office aika nung staff tem dang kidang nungi mapa inyaksü ashi.

(Maneni tapak 8 nung...)

**Obama-ia US Tir Biden dak tamang makar**

**Washington, Chiteni/July 19 (Agencies):** Taoba tir Barack Obama-i külem party pur dang Joe Biden asoshi takok lenmang kanga sashia samaa ogo aser pa US tir asoshi tanaben tokteptsü aliba kanga süoki ia bilemdangshitsü nüngdaker ta ashi, ta osang balala ajanga Brehostibarnü ashi.

Taoba ita Republican telok nungi pa den tokteptsü alisang Donald Trump den o intepba mapang kanga mejungi shilem agiba sülen Democrats, analysts aser voter temi Joe Biden ya kümsük tanabuba US tir inyaksü atema tekolok akhi ama masü aser temang nung tashi mait jenti lir ta shisabolua bilemer.

Tir Joe Biden dak taküm November ita election nung takok angutsü tashi atema Democrats temi shisabolua bilemba ajanga pa dang tanaben election nung shilem aginüba bilemdangshitsü ajungshir tali akumer. Biden dang tanaben election nung tokteptsü aliba asadangshitsü ajungshia data amshir aser temulung ajak rakpoka sensaksem akar.

Donald Trump den tokteptsü asoshi candidate danga ka nem

lenmang aijang ta US Tir Joe Biden dang yimjak nung ajungshir Democrat telok nungi yimten yimsüsür aika akumer aser Bodhbarnü Representative Adam Schiff-ia iba tayongzücka agütsü.

Pai Biden dang milen ya amoktsütsü ayongzüc.

Congress nung tashi tait Schiff-i Biden tenüng asang saka arishi küm 81 tain Biden-i Trump madak takok angutsü tamang makar, ta Los Angeles Times dang ashi.

Biden indang arishi küm aser pa temang mechi November election nung tamakok angutsü ya par party telungzüc nung aiben shisadanga indang Schiff-i ashi.

COVID-19 tashidak puteta tang Delaware nung par kidang isolation nung alisang Biden-i aiben US tir asoshi tokteptsü tejangraba lir ta shia lir aser Trump akoktsü asoshi pa tajungtiba ta ashir. Polls agiba nung Trump ya tongtipang state tem nung jenjang tajungba sayur.

Senate Majority Leader Chuck Schumer aser House Democratic Leader Hakeem Jeffries nungeria tir den Capitol Hill nung aliba Democrats temi bilemba lemsatepogo ta ashir.

**Software update ka ajanga tayimtsü, banks, telecoms aser media nung kongshi**

**Chiteni/July 19, 2024 (Agencies):** Hokulbarnü software update ka ajanga alima tesem ajungalen computer systems nung takoksa tulu agüja tayimtsü tem anena ata, broadcasters kar shibangtsüsa akum aser banking nungi healthcare tashi services tem nung kongshi.

Global cybersecurity firm CrowdStrike (CRWD.O) ajanga agütsüba product ka nung update ajanga iba ya tenzüc amai angateter, aser iba yagi Microsoft indang Windows Operating System amshiba customers dak kongshi. Hokulbar nikongdang Microsoft-i iba tebilemstü ya bentetogo ta ashi.

“Windows hosts atema single content update nung meshidak ngutetba ajanga kongshir aliba customers tem den company-i meranga inyaker aser ‘fix’ ka yokogo,” ta CrowdStrike CEO George Kurtz-i social media sapang X nung ashi. “Ibai security mesüra cyberattack masü,” ta Kurtz-i ashi.

Hokulbarnü US nung tongtipang airlines – American Airlines, Delta Airlines aser United Airlines temi tayimtsü mesenzüdaksüi soita ayu aser danga carriers alima tesem balala nung tayimtsü menuba mesüra timtem ajuruba osangtem lir.

Australia nungi India tashi aser Germany nung banks aser financial services company temi customer tem dang iba meinprongba indang tekumdangtsü shia liasü aser market balala nung shishilempar temi transaction nung timtem

ajurua liasü. Britain nung doctor temi amshiba booking systems offline liasü aser iba linük nung news broadcasters tulu, Sky News shibanga live mesayutetba atema tatok meshi aser football asayaba club Manchester United-i tickets sayatsü aliba mapang thinener ta sangdonga liasü.

Microsoft indang cloud unit Azure-ia Windows OS amshiba virtual machines nung kongshiba tebilemstü meteta lir ta ashi. “Third-party software platform nungi update ka ajanga Windows devices nung kongshiba indang onoki meteta lir,” ta Microsoft indang odongtar kati ashi.

Hokulbarnü 05:30 ako (GMT) meta CrowdStrike ajanga clients tem dangi alert ka yongba nung Falcon Sensor software ajanga Microsoft Windows ‘crash’ sädaksü aser ‘blue screen’ dang sayur ta ashi.

Singapore, Hong Kong aser India nung aliba airports temi iba timtem ya ajanga airlines kari passenger tem nisungi reprangtsüsa akum ta ashi.

Europe nung mazüngtiba airport, Amsterdam indang Schiphol Airport nunga kongshi aser Iberia airlines-ia electronic check-in counters aser online check-ins tem reactivate masü tashi nisungi inyaka liasü ta ashi. Tayimtsü menuba liasü saka athibabo mali ta ashi.

Company balalai tanemtanemi services tem tanaben lapokba osangtem lir aser analysts temi iba ya industry aser economy nung outage tulutiba alitsü ta ashir.

# Alvaro Morata-i AC Milan nung küm pezü asayatsü



**Milan, Chiteni/July 19 (Agencies):** Spain captain aser Atletico Madrid forward Alvaro Morata-i Serie A tsütsü AC Milan nungi küm pezü asayatsü asoshi züluteptsü Hokulbarnü mulungtepogo, ta osang ajanga ashir.

Transfer market expert Fabrizio Romano-i Euro 2024 asayamung akoker captain-i Milan nung pa indang sempet sayutsü aser 2028 tashi Rossoneri atema asayatsü ta sangdong.

Spain nunger Morata alizüksü atema Milan-i morata indang 13-million euro release clause amshi ta ashir.

Morata, shiba Real Madrid nungi taoba mapang asaya liasü, pa ya taoba season nung Los Blancos den tokteper Atletico Madrid nung tongtipang shilem agia La Liga nung parnok asoshi goal 15 agüja liasü.

Spanish forward ya Wanda Metropolitano yutsütsü telemteba agiba sangdongogo ta hopta tetenzüklen osang prokshia liasü aser manager Diego Simeone dang tatem salem shir liasü.

“Ni temang tendangtsü aser AC Milan nung adentsü. Nai noklang shilem magütsütet dang pilaba tajungba. Külemi asayartem, Diego Simeon easer

board dang ni tatem salem shiogo. Yamaji inyaka pelar ta ashitsü tongtipang liasü,” ta Morata-i Spanish news outlet COPE dang ashi.

Morata wangshiba mapang Atletico nungi asayaka European trophy kata mongutet aser taoba season nunga UEFA Champions League quarter-final nung Borussia Dortmund-i tsükdaktsü. Ajisüaka Morata asoshi Spain den Euro asayamung akokba ya Atletico dangi temeim shiti züluba ama liasü.

“Ni atema Spain den European Championship takok marok ajungketba ya Atletico den takok marok ka anguba den sako lir. Ni ya kechiba ashir ta süra, Atletico ya kü indang ‘shin guards’ nung aliba club ka lir, aser onoki iba asayamung takok angudang ni Atletico tula sema liasü,” ta Morata-i ashi.

“Zlatan aser Fonseca (Milan indang manager tasenba) nungeri tongti shilem agia pa mesüzük. Ibrahimovic-i Milan striker asütsü nungdakba meteta lir, aser Fonseca-i iba project nung pa kota tongtipang, iba indang rasaa ashi,” ta AC Milan CEO Giorio Furlani-i ashi.

Taoba season Serie A nung Inter kübok points 19 nung AC Milan ya trophy kata monguteti tembang, saka Fonseca lenisüba kübok 2024-25 nung asendenshitsü imlar.

# Nadal-i tan season nung mezüngbuba semi final tongogo



**Stockholm, Chiteni/July 19 (Agencies):** Rafael Nadal-i ghonda asem ser minute 58 asayar taküm asoshi mezüngbuba semi-final tongteta Swedish Open tennis asayamung nung Argentina nunger Mariano Navone madak takok ngua liasü.

Arishi küm 38 tain Nadal-i seed pezü buba nung alisang Navone madak 6-7 (2-7) 7-5 7-5 agi takok ngua final asoshi Croatia nunger Duje Ajdukovic den asayatsü.

Spain nungba Nadal ya tarep semi-finals nung Casper Ruud den külemi Brazil nunger Orlando Luz aser Rafael Matos den asayatsü, shibai Paris Olympics nung Carlos Alcaraz den külemi asayatsü renemshiba mapang lir.

Nadal o Navone tsüngta kanga junga asayatetba ajanga first-set tie-break asü saka Argentina nungbai akok.

Tanabuba set nung anaben tamakok ajurua 3-0 akum aser Nadal ya ano games pezü nung tamok ajurua liasü.

Nadal-i maneni 6-5 kumdaaktsü aser bendanga agütsür iba match kasasa kumdaaktsü.

Match atema mezüng serve asü dang 22 ben Grand Slam bena alisang Nadal-i bilemba ama meyoktet saka tanaben buba nung koka liasü.

“Mezüngbuba nung iba temang shia arutsü meranger aser imlar. Temang lanur ka süaka teti atema inyaka taneptsü angutsü nungdaker. Koma südir asüng metettsü,” ta Nadal-i asaya temer ashi.

# Israel-i Paris 2024 Football Tournament nung asayatsü

**Zurich, Chiteni/July 19 (Agencies):** Hamas den raraba mechi Israel ya international football

asayamung nungi anenja atatsü Palestine nungeri ken o benokba nung FIFA-i telemteba agitsü anogo thinenba ajanga Israel nunger tebur national team ya Paris Olympics nung asayatsü lenmang lapoktsür.

Ita ana tejakdang Palestine nungeri independent legal

assessment atema asüngdangba sülen FIFA yagi Honibarnü extraordinary council meeting ka nung telemteba agitsü lir.

Olympic soccer tournament tenzüksü anogo pezü dang lia iba telemteba ya agitsü, kong Israel ya Japan, Mali aser Paraguay aliba telok nung dena lir.

Kanga junga asameyangba maparen tatem kati arutsü asoshi mapang tali nungdakba

ajanga anogo thinener, ta FIFA-i Brehostibarnü ashi, anungji iba telemteba ya Olympics tembangba sülen ang arutsü.

Telok anaprongi pei jenjang agütsütsü atema mapang atsülangtsü mepishia liasü, aser independent assessment ya FIFA den August 31 tashinung lemsateptettsü, ta ashi.

Paris Olympics nung tebur football final ya August 9 nü asayatsü lir.

# UK Anti-Doping-i Helenius nem küm ana tenokdangba agütsü

**London, Chiteni/July 19 (Agencies):** Britain nunger Anthony Joshua den August 2023 nung tsüngtepba sülen UK Anti-Doping ajanga drug test agiba nung tsükba sülen Robert Helenius nem küm ana tenokdangba agütsüogo.

Finland nungi arishi küm 40 tain Helenius ya Joshua-i knockout sür anogo ka lir Ukad nem sample agütsüba nung ‘female fertility drug clomifene’ aliba puteta liasü.

Pai asaa mozü ya achiba masü ta ashir aser Ukad ajanga ngutetba ya pai entzü aser anshi tamajung achiba nungi lir ta tenüng asener.

Ajisüaka Helenius-i metsüngtepdang achiba entzü aser anshi ya clomifene agüja aliba an nungi lir ta kuli kecha magütsütet, ta Ukad-i ashir.

Helenius ya provisional tsütsü September 18, 2023 nü suspend sütsü, aser iba anogo nungi pa tenokdangba azüngtsü aser ano September 18, 2025 nü tsüngteptettsü.

Mezüngbo Helenius ya Dillian Whyte den tsüngteptsü liasü, saka metsüngtepdang Voluntary Anti-Doping Association (Vada) test agiba nung “adverse analytical finding” mechi Joshua den tsüngteptsüsa akum aser round

tenet buba nung knock out asü.

Joshua den tsüngteptsü anogo ka lia Vada ajanga tendangba nunga Helenius dak ‘adverse finding’ liasü, saka iba results ya tsüngteper hopta ana lir ang metet. Tebur testosterone level tashi itdaktsütsü mechi Clomifene ya amshir aser iba ya World Anti-Doping Agency (Wada) ajanga nokdanga lir.

British welterweight Conor Benn ya October 2022 nung Chris Eubank Jr den tsüngteptsü lia Vada tests ana nung clomifene puteta liasü.

Benn-i asaa iba mozü ya machi aser chiyongtsü tamajung achiba nungi lir ta shia liasü.

## BENDANGLI OSANG : Tapak 7 nungi...

### Bangladesh nung longkak aitdak asür...

Ruling party indang kaketshir activists temi yimtung nung long aser süng amer longkak aiter tem den asatepba sülen Brehostibarnü tensa tamajungba akum südi ta osangtem ajanga ashir.

Law minister Anisul Huq-i Brehostibarnü osangbener den jembidang sorkari longkak aita aliba kaketshirtem den mener jembishinü akatsü lemtetogo aser Ato Kilonser Sheikh Hasina-i Education Minister Mohibul Hassan Chowdhury küna nem iba mapa inyaktsü nungloktsü ta ashi.

Ato kilonseri Bodhbarnü nangzüka ama Brehostibarnü judicial investigation committee ka kumtetogo, kong High Court judge Khondkar Diliruzzaman tekolakba asütsü aser parnoki iba mepetmesü nung nisung tepsetba indang bushisüngdangtsü, ta law minister-i ashi.

Pai longkak aiterem dang anentsü ajungshi. Saka tan ita longkak aitba nung telok tongtiba, Students Against Discrimination ajanga ashiba agi, ato kilonser o nung temulung masür aser par party activists temi nisung tepsetba aser ki o jen raksatsüba indang shia mali.

Iba sülen longkak aiter

indang odongtar kati parnoki joko sorkar den jembishinütsü memeranger ta ashi aser coordinators rongnung Nazmul Hassan-i, “Tekeratiba nung sorkar mapa nung quotas agienja gazette notification agütsütsü onoki akhanger,” ta ashi. Sorkar mapa nung shilem 56 tang aliba quota system kübok wazüka yuja lir.

1971 Liberation War freedom fighters atema shilem 30, backward administrative districts atema shilem 10, tetsür atema shilem ter, ethnic minority teloktem atema shilem pongu aser matamabensar atema shilem ka wazüka yuja lir.

Küm shia nisung 4,00,000 jungnüa graduate sür alirtem atema sorkar mapa 3,000 shi lapoktsür. Tang aliba system yagi first-class aser second-class government jobs nung tekolok techirartem meshimer ta longkak aiter temi ashi.

Supreme Court ajanga iba ken o ya August 7 nü jembitsü lemteta lir aser PM Hasina-i longkak aiterem dang aremzüka atatsü aser Supreme Court dak tamang akatsü Bodhbarnü ayongzüka liasü.

Iba ken o tekeraba nung jembitsü atema sorkari petition ka agütsütsü ta law minister-i ashi.

**BILEMDANGANG**  
"Temulung melemibo kecha temerang."